



REPUBLIKA E SHQIPËRISË

**KËSHILLI I LARTË GJYQËSOR**

Nr. \_\_\_\_ Prot.

Tiranë, \_\_\_\_\_.\_\_\_\_.2024

**VENDIM**

**Nr. 171, Datë 03.04.2024**

**PËR  
MIRATIMIN E KËRKESËS SË GJYQTARES {...}  
PËR DHËNIE LEJE TË PAPAGUAR**

Këshilli i Lartë Gjyqësor, në mbledhjen plenare të datës 03.04.2024, si u njoh me materialet e çështjes, relacionin “*Mbi projektvendimin për miratimin e kërkesës së gjyqtares {...} për dhënie leje të papaguar*”, përgatitur nga relatorja, znj. Emona Muçi, si dhe pasi shqyrtoi propozimin e Komisionit për Vlerësimin e Etikës dhe Veprimtarisë Profesionale,

**VËREN:**

**I. FAKTET E ÇËSHTJES**

1. Në datën 28.02.2024, me nr. 1301 prot., është regjistruar në Këshillin e Lartë Gjyqësor kërkesa e znj. {...}, gjyqtare në Gjykatën e Shkallës së Parë të Juridiksionit të Përgjithshëm Tiranë për dhënie leje për qëllim kualifikimi dhe specializimi profesional, për periudhën 08.04.2024 deri në 02.05.2024.

2. Në kërkesën me shkrim znj.{...} parashtron se është nominuar nga Zyra e Marrëdhënieve me Publikun dhe nga Zyra e OPDAT pranë Ambasadës së Shteteve të Bashkuara të Amerikës, Tiranë, për pjesëmarrjen në Programin e Lidershipit të Vizionit Ndërkombëtarë. Gjyqtarja parashtron se ky program paraqet rendësi të veçantë në lidhje me detyrën që ushtron, pasi është i orientuar në marrjen e njohurive në lidhje me standardet dhe parimet për një sistem gjyqësor të pavarur, transparent dhe në respektim të vlerave morale dhe etike, si dhe në theksimin e rolit të gjyqësorit në forcimin e parimeve të shtetit demokratik përmes realizimit të procesit të rregullt ligjor në mbrojtjen e të drejtave të fëmijëve, grave si në fushën familjare, civile dhe penale. Pjesëmarrjen në këtë program gjyqtarja e vlerëson së pari si një vlerësim mjaft pozitiv që i është bërë kandidatues së saj, si dhe së dyti në drejtim të ndikimit në rritjen e saj profesionale, pasi do t’i jap mundësinë që përmes shkëmbimit të eksperiencës të marrë njohuri për sistemin amerikan të drejtësisë për çështje ligjore dhe më pas në vështrim krahasues në punën e saj si gjyqtare të zbatojë praktikatat më të mira në lidhje me to.

3. Kërkesës me shkrim i është bashkëlidhur mendimi i zëvendëskryetarit të gjykatës, letër suportit datë 27.02.2024 lëshuar nga Ambasada e Shteteve të Bashkuara të Amerikës, Tiranë, si dhe komunikimi elektronik mbi nominim e gjyqtares për të marrë pjesë në Programin e Lidërshipt të Vizionit Ndërkombëtar.

## **II. PROCEDURA E ZHVILLUAR**

4. Komisioni për Vlerësimin e Etikës dhe Veprimtarisë Profesionale, me qëllim trajtimin e kërkesës së gjyqtares {...}, duke iu referuar parashikimeve të nenit 24, të ligjit nr. 96/2016 *“Për statusin e gjyqtarëve dhe prokurorëve në Republikën e Shqipërisë”*, i ndryshuar dhe vendimit të Këshillit të Lartë Gjyqësor nr. 72, datë 20.02.2019 *“Për lejet e papaguara të gjyqtarëve që jepen nga Këshilli i Lartë Gjyqësor”*, u kërkuan nga Gjykata e Shkallës së Parë të Juridiksionit të Përgjithshëm Tiranë të dhëna lidhur me ngarkesën aktuale të gjyqtares {...}.

5. Në lidhje me funksionalitetin e Gjykatës, Zv. Kryetari i gjykatës me shkresën datë 28.02.2024 ka dhënë mendim lidhur me kërkesën e gjyqtares duke parashtruar se: *“Pasi u njoha me kërkesën për leje për kualifikim profesional të gjyqtares znj. {...} për pjesëmarrjen në programin e Lidërshipt të Vizionit Ndërkombëtar, për periudhën e kërkuar prej saj, dua t’ju shpreh mendimin tim se kërkesa nuk cenon funksionalitetin e gjykatës dhe përmbushjen e detyra të magistrates, si dhe se e mbështes në këtë kualifikim duke vlerësuar se do të ndikojë dhe do të jetë një vlerë në punën e gjyqtares”*. Lidhur me ngarkesën aktuale të gjyqtares, nga informacioni i përcjellë nga gjykata nëpërmjet postës elektronike, datë 26.03.2024, rezulton se ngarkesa aktuale e gjyqtares, në datën e përcjelljes së informacionit, është 639 çështje në shqyrtim, nga të cilat 481 çështje civile themeli, 136 kërkesa për lëshim urdhër ekzekutimi, 11 kërkesa civile dhe 11 OJF.

6. Pas përfundimit të procedurës si më sipër, në mbledhjen e datës 27.03.2024 Komisioni vendosi që kjo çështje t’i kalojë për shqyrtim Mbledhjes Plenare.

7. Çështja u morr në shqyrtim në mbledhjen plenare të Këshillit në datën 03.04.2024, brenda afatit 15 ditor nga paraqitja e propozimit në referim të parashikimeve të pikës 6 shkronja “b” të vendimit nr.72, datë 20.05.2019 të KLGJ.

## **III. KUADRI LIGJOR I ZBATUESHËM**

8. Neni 24 i ligjit nr.96/2016 *“Për statusin e gjyqtarëve dhe prokurorëve në Republikën e Shqipërisë”* parashikon se: *“1. Përveç pushimeve vjetore, magistrati gëzon të drejtën të marrë në përputhje me Kodin e Punës: a) pushime të tjera; b) leje prindërore...6. Këshilli përcakton rregulla më të detajuara për kriteret dhe procedurat për dhënien e lejes së papaguar.”* (neni 24 pika 6 i Ligjit nr. 96/2016).

9. Këshilli i Lartë Gjyqësor ka miratuar vendimin nr.72, datë 20.05.2019 për *“Lejet e papaguara të gjyqtarëve që jepen nga Këshilli i Lartë Gjyqësor”*, në të cilin përcaktohen kriteret dhe procedura e dhënies së këtyre lejeve.

10. Në lidhje me kushtet për dhënien e lejes për qëllime kualifikimi dhe specializimi, pika VI e vendimit nr.72, datë 20.05.2019 *“Për lejet e papaguara të gjyqtarëve që jepen nga Këshilli i Lartë Gjyqësor”*, parashikon se: *“6. Leja për qëllime kualifikimi dhe specializimi në një institucion trajnimi, jepet nga Këshilli për një periudhë jo më shumë se dy vjet, si me poshtë: a. Gjyqtari që kërkon këtë leje, paraqet kërkesën me shkrim në Këshill, të paktën 30 ditë para kohës kur kërkon të fillojë kjo leje. Kërkesa duhet të përmbajë përshkrimin e arsyes për ndjekjen e këtij trajnimi, afatin e lejes dhe të dhëna për institucionin trajnues. Kërkesës duhet t’i bashkëngjitet dokumentacioni justifikues, si dhe mendimi me shkrim nga kryetari i gjykatës në lidhje me cenimin ose jo të funksionalitetit të gjykatës; b. Kërkesa e gjyqtarit trajtohet nga Komisioni përkatës, i cili brenda 7 ditëve i përcjell Mbledhjes Plenare propozimin për miratimin ose refuzimin e lejes. Këshilli merr vendim për këtë kërkesë brenda 15 ditëve nga paraqitja e propozimit; c. Kjo leje mund të jepet e gjitha njëherësh, ose në periudha të ndryshme, sipas kërkesës së gjyqtarit, por në total jo më shumë se 2 vjet. Në vendimin për dhënien e lejes, Këshilli shprehet edhe në lidhje me rihedhjen ose jo në short, të çështjeve që gjyqtari ka në shqyrtim; ç) Këshilli mund të refuzojë kërkesën për këtë leje, nëse kualifikimi profesional ose specializimi nuk përputhet me funksionin e gjyqtarit, ose nëse ajo bie ndesh me interesat kryesore të funksionit dhe vë në rrezik përmbushjen e funksionit me efikasitet dhe në kohë”*.

#### **IV. ANALIZA LIGJORE E ÇËSHTJES**

11. Lidhur me lejen e papaguar, në nenin 24 të ligjit nr.96/2016 *“Për statusin e gjyqtarëve dhe prokurorëve në Republikën e Shqipërisë”*, i ndryshuar, parashikohet se magjistrati mund të për përfitojë leje prindërore ose pushime të tjera. Në këtë nen parashikohen disa kriteret për dhënien e lejes së papaguar nga Këshilli dhe njëkohësisht parashikohet se: *“Këshilli përcakton rregulla më të detajuara për kriteret dhe procedurat për dhënien e lejes së papaguar.” (neni 24, pika 6 i ligjit nr. 96/2016)*. Në bazë të këtij parashikimi, Këshilli i Lartë Gjyqësor ka miratuar vendimin nr.72, datë 20.05.2019 për *“Lejet e papaguara të gjyqtarëve që jepen nga Këshilli i Lartë Gjyqësor”*, në të cilin përcaktohen kriteret dhe procedura e dhënies së lejeve të papaguara.

12. Sa i përket llojit të lejeve të papaguara që jepen nga Këshilli, neni 24 i ligjit nr.96/2016 dhe vendimi nr.72, datë 20.05.2019 i Këshillit të Lartë Gjyqësor, në pikën 4, parashikojnë tre lloje të lejes dhe konkretisht :

- a. Leje prindërore;
- b. Leje për qëllime kualifikimi dhe specializimi në një institucion trajnimi, jashtë periudhës së trajtimit vazhdues;**
- c. Leje për arsye familjare dhe/ose shëndetësore.

13. Në kërkesën e znj.{...} parashtrohet se kërkohet leje për qëllim kualifikimi dhe specializimi profesional, jashtë periudhës së trajtimit vazhdues dhe konkretisht leje me qëllim marrjen pjesë në Programin e Lidershipit të Vizionit Ndërkombëtar, me periudhë qëndrimi 6-30 prill 2024, që do të zhvillohet në SHBA.

14. Sa i përket kushteve për dhënien e lejes për qëllime kualifikimin dhe specializimi, sipas parashikimeve të pikës 6 të vendimit nr.72, datë 20.05.2019 të Këshillit të Lartë Gjyqësor, parashikohet si më poshtë:

- (i) Gjyqtari që kërkon lejen duhet të paraqesë kërkesë me shkrim pranë Këshillit të paktën 30 ditë para fillimit të lejes së kërkuar. Në rastin konkret gjyqtarja ka paraqitur kërkesën me shkrim në datën 28.02.2024 ndërkohë që leja kërkohet të fillohet në datën 08.04.2024. Pra, kërkesa është paraqitur më shumë se 30 ditë para kohës së fillimit të specializimit për të cilat kërkohet dhënia e lejes;
- (ii) Kërkesa duhet të përmbajë përshkrimin e arsyes për të cilën kërkohet leja, kohëzgjatjen saj dhe të dhëna për institucionin pranë të cilit do të zhvillohet aktiviteti kualifikues. Në rastin konkret, në kërkesën e gjyqtares përcaktohet qartë arsye e kërkimit të lejes që konsiston në pjesëmarrjen e saj në Programin e Lidershipit të Vizionit Ndërkombëtar të nominuar nga Zyra e Marrëdhënieve me Publikun dhe Zyra e OPDAT pranë Ambasadës së Shteteve të Bashkuara të Amerikës, Tiranë. Gjithashtu është përcaktuar qartë kohëzgjatja e lejes nga data 08.04.2024 deri në datën 02.05.2024.
- (iii) Kërkesa duhet të shoqërohet me dokumentacionin justifikues, si dhe mendimin e kryetarit të gjykatës për cenimin ose jo të funksionaliteti të gjykatës. Në rastin konkret kërkesa e gjyqtares {...} është shoqëruar me dokumentacion justifikues që konsiston në kualifikimin dhe specializimin profesional në kuadër të Programit të Lidershipit të Vizionit Ndërkombëtar. Gjithashtu është paraqitur mendimi me shkrim i zëvendëskryetarit të Gjykatës së Shkallës së Parë të Juridiksionit të Përgjithshëm Tiranë sipas të cilit kërkesa nuk cenon funksionalitetin e gjykatës, si dhe është në përmbushjen me detyrat e magjistrates. Lidhur me cenimin e funksionalitetit të gjykatës, veç mendimit të zëvendëskryetarit, është administruar informacion lidhur me ngarkesën aktuale të gjyqtares, ku rezulton se gjyqtarja ka në shqyrtim 639 çështje.
- (iv) Leja e kërkuar të mos kalojë afatin maksimal prej 2 vjetësh. Në rastin konkret leja e kërkuar është për një periudhë më të shkurtër se dy vjet dhe konkretisht për periudhën 08.04.2024 deri në 02.05.2024 (24 ditë).
- (v) Kualifikimi profesional të mos ketë mospërputhje me funksionin e gjyqtarit ose të mos bjerë ndesh me interesat kryesore të funksionit dhe vë në rrezik përmbushjen e funksionit me efikasitet dhe në kohë. Lidhur me këtë kriter, nga informacioni i përcjellë bashkëlidhur kërkesës rezulton se kualifikimi/specializimi të cilin gjyqtarja do të finalizojë nëpërmjet pjesëmarrjes në programin si më sipër, është në fushën e ligjit dhe për pasojë, nuk rezulton të mos ketë mospërputhje me funksionin e gjyqtarit apo të bie ndesh me interesat kryesore të funksionit të saj. Pjesëmarrja e

gjqtares në Programin e Lidërshipt të Vizionit Ndërkombëtar vlerësohet se nuk ka mospërputhje me funksionin e gjyqtarit dhe nuk bie ndesh me interesat kryesore të funksionit.

15. Për sa më sipër, rezulton se kërkesa e gjyqtares {...} për leje të papaguar për qëllim kualifikimi dhe specializimi, jashtë periudhës së trajtimit vazhdues përmbush kriteret e përcaktuara në neni 24, të ligjit nr. 96/2016 dhe vendimin nr.72, datë 20.05.2019 për “Lejet e papaguara të gjyqtarëve që jepen nga Këshilli i Lartë Gjyqësor”.

16. Sa i përket çështjeve gjyqësore të cilat gjyqtarja {...} ka në shqyrtim në kreun VI, pika 6, shkronja c) të vendimit nr.72, datë 20.05.2019, parashikohet se: *“Në vendimin për dhënien e lejes, Këshilli shprehet edhe në lidhje me rihedhjen ose jo në short të çështjeve që gjyqtari ka në shqyrtim”*. Në kushtet kur leja e kërkuar ka një kohëzgjatje prej 24 ditësh (08.04.2024-02.05.2024), Këshilli vlerëson se çështjet që gjyqtarja ka në shqyrtim nuk duhen të rishortohen, por të mbeten në gjykim pranë saj.

## **V. KONKLUZIONI**

Për sa arsyetohet më lart, Këshilli vlerëson se kërkesa e gjyqtares {...} për dhënie leje te papaguar, për qëllim kualifikimi dhe specializimi, për një periudhë prej 24 ditësh, përmbush kushtet ligjore dhe ato të përcaktuara në aktin nënligjor të KLGJ dhe si e tillë duhet të pranohet. Në lidhje me të drejtën e ankimit, në referim të parashikimeve të nenit 100 të ligjit nr.115/2016, i ndryshuar me ligjin nr. 47/2016, kundër vendimit mund të bëhet ankim në Gjykatën Administrative të Apelit brenda 15 ditëve nga data e njoftimit të vendimit.

### **PËR KËTO ARSYE:**

Këshilli i Lartë Gjyqësor, bazuar në nenet 61, 68 të ligjit nr. 115/2016 “Për organet e qeverisjes së sistemit të drejtësisë” të ndryshuar, në nenin 24, të ligjit nr. 96/2016 “Për statusin e gjyqtarëve dhe prokurorëve në Republikën e Shqipërisë”, i ndryshuar dhe vendimin nr.72, datë 20.05.2019 “Për lejet e papaguara të gjyqtarëve që jepen nga Këshilli i Lartë Gjyqësor”,

### **VENDOSI:**

1. Miratimin e kërkesës së znj.{...}, gjyqtare në Gjykatë në Shkallës së Parë të Juridiksionit të Përgjithshëm Tiranë, për dhënie leje të papaguar për qëllime kualifikimi dhe specializimi, nga data 08.04.2024 deri në datën 02.05.2024.
2. Përrjashtimin tërësisht nga shorti i gjyqtares {...}, gjatë periudhës së lejes së papaguar.
3. Njoftimin e këtij vendimi gjyqtares {...} dhe Gjykatës së Shkallës së Parë të Juridiksionit të Përgjithshëm Tiranë.

4. Kundër këtij vendimi mund të bëhet ankim në Gjykatën Administrativë të Apelit brenda pesëmbëdhjetë ditëve nga e nesërmja e komunikimit të vendimit të arsyetuar.

Ky vendim hyn në fuqi menjëherë dhe botohet në faqen zyrtare të internetit të Këshillit, pasi të redaktohet për sigurimin e anonimitetit.

## **PËR KËSHILLIN E LARTË GJYQËSOR**